

TEZAUUR LITURGIC
27 NOIEMBRIE

ACATISTUL
SF. CUVIOASE-MUCENIȚE
RAFAELA
TARTATKOI
DE LA
CIGHIRINSK



MOSCOVA, 2000



Акафист святой преподобномученице Рафаиле, чудотворице Чигиринской

Кондак 1

Избранная угоднице и невесто Христова, града Чигирина и всего мира христианскаго похвало и утверждение, преподобная и богоносная мати Рафаило, подвигом добрым подвизившаяся, исповедничеством и мученичеством всепобедным просиявшая, ныне о спасении нашем усердно предстательствуеши пред Престолом Троицы Всесвятыя. Мы же в похвалу тебе зовем сие:

Радуйся, святая преподобная мати наша Рафаило, мученице Христова и чудотворице достославная!

Икос 1

Ангелов сонмы и вся силы Небесныя славословят выну Творца миров дольняго и горняго, с ними же купно ликуеши присно, святая богоносная и присноблаженная мати наша Рафаило, к лику жен преподобных и новомученик преславных Господом сопричтенная. Мы же, торжествуя на земли славу твою небесную, вопием ти сие:

Радуйся, с горними чинами Христа присно
величающая;
Радуйся, со всеми святыми славу Царя
Небеснаго созерцающая;
Радуйся, Церковью Христовою прославляемая и
величаемая;
Радуйся, от земнородных с радостью
почитаемая;
Радуйся, спасения вечнаго нашего всеблагая
путеводительнице;
Радуйся, благополучия земнаго предобрая
попечительнице;
Радуйся, блага духовныя нам ниспосылающая;
Радуйся, отраду и утешение верным христианом
дарующая;
Радуйся, святая преподобная мати наша
Рафаило, мученице Христова и чудотворице
достославная!

Кондак 2

Видя Всеблагий и Премудрый Господь чистоту
сердца твоего и любви теплую ко всему творению
Своему и велие желание жития иноческаго
благоволи призвати тя на служение Себе и
чадом Своим во святую чигиринскую Свято-
Троицкую обитель, идеже ты, святая
ангелоподобная мати, в посте и молитве
неленостно подвизалася еси и жития воистину
равноангельскаго достигла еси, в пострижении

же имя милосерднаго архистратига Рафаила
приятн сподобилася еси, с ним же ныне моли
Христа Спасителя помилovati и благословити
всех нас, вопиющих ныне Господеви: Аллилуйя!

Икос 2

Разумом божественным от дней детства твоего
просвещаемая, всеблаженная невесто Христова,
и благодатию Господнею согреваемая и
движимая, возлюбила еси паче благ земных
Иисуса Сладчайшего, и Ему Единому служити
желая, оставила еси мир и имения родителей
твоих и в преславную Свято-Троицкую
Чигиринскую обитель удалилася еси, идеже
обеты священные Господеви принесла еси. Сего
ради таковыя похвалы приносим ти:

Радуйся, рода именитаго отрасли благородная;

Радуйся, лозо вертограда Христова
богатоплодная;

Радуйся, края чигиринского похвало и
утверждение;

Радуйся, сословия дворянского преизрядное
украшение;

Радуйся, добрая и усердная последователнице
евангельского учения;

Радуйся, благочестия предков твоих
прехвальная сонаследнице;

Радуйся, от младых лет Иисуса Сладчайшего
возлюбившая;

Радуйся, во дни юности твоя вся себе Ему
Единому посвятившая;
Радуйся, святая преподобная мати наша
Рафаило, мученице Христова и чудотворице
достославная!

Кондак 3

Силою и благодатию Духа Святаго движимая,
храняемая и озаряемая, святая Рафаило, лепоту
мира дольнего, сотвореннаго Всеблагим
Господем, со умилением созерцала еси,
благодарящее Бога за Премудрость Его,
явленную во творении, воспевая на земли Царю
Небесному пение ангельское: Аллилуйя!

Икос 3

Имуще в душе твоей, пречудная Рафаило, любви
ко Господу и творению Его, с радостию
сердечною цветы возвращала еси в обители
Чигиринской, дабы в лепоте сей явити образ
славы Божия; такожде и ко иным послушаниям
ревность благую явила еси, советом стариц
опытных внимая, от силы в силу восходя, да
прославится в тебе Иисус Сладчайший, Его же
ради усердно подвизалася еси. Приклони к нам
милосердие Небесного Жениха Твоего
вопиющим ти сице:
Радуйся, кротость и смирение Христово
возлюбившая;

Радуйся, отраду небесную еще на земли обретшая;
Радуйся, непреложное упование и всецелое доверие к Богу стяжавшая;
Радуйся, тихую радость и мир непрестанно нам дарующая;
Радуйся, милосердием к себе и ближним сердца наша преображающая;
Радуйся, материнскою любовью твоею всех согревающая;
Радуйся, все прошения наша во благо исполняющая;
Радуйся, творити нелицемерно дела добрыя нас подвизающая;
Радуйся, святая преподобная мати наша Рафаило, мученице Христова и чудотворице достославная!

Кондак 4

Бурю злых напастей, нестроений и искушений верою, кротостию, молитвами горячима твоима и незлобием рассеяла еси, преподобная мати, ибо добродетельми христианскими, аки щитом, от стрел и духов лукавых обороняла еси себя и ближних своих, советом святых отец внимала еси, темже в святости и чистоте прошла еси все житие твое иноческое и мученичество увенчала еси е; ныне же во славе предстоиши Творцу Нашему и молишися, да утвердится любы

святая в сердцах христианских. Тем же и нас, грешных, святая Рафаило, сподвигаеши нелицемерне Господеви служити и с сыновьей любовью воспевати Ему: «Аллилуйя!»

Икос 4

Слышавши смуты и войны и военные слухи, ничтоже убоясь мудрая мати Рафаило, разумеюще, яко вси путие народов и царств в деснице Всемудраго Бога выну пребывают, в годину тяжкую смут и невзгод На Него Единого упование твое возложила еси. Просим тя, мати святая: настави и нас твердо на Господа уповати, да тебе подражающее, благодарне воззовем сице:

Радуйся, благосердие Отца Небеснаго к нам приклоняющая;

Радуйся, Сына Божиего паче всего земнаго любити научающая;

Радуйся, о дарех духовных Всеблагаго

Утешителя умоляющая;

Радуйся, о благосостоянии Церкви Христовой присное моление;

Радуйся, от блудных страсти и винопития исцеляющая;

Радуйся, в деятельной любви и сострадании верных утверждение;

Радуйся, от сна духовнаго теплохладных пробуждение;

Радуйся, омраченных умов и очерствелых сердец просветление и преображение;
Радуйся, святая преподобная мати наша Рафаило, мученице Христова и чудотворице достославная!

Кондак 5

Боготечною звездою просияла, от силы в силу восходяще благодатию Спасовою, и воистину свет миру явилася еси. Настави и нас от тьмы греховных ко свету Божественному присно шествовати, вопиюще Христу : Аллилуйя!

Икос 5

Видевше сестры обители дивную Рафаилу, имущую дар рассуждения и молитвы и дивящиеся премудрости ея, изволиша ю игумению бытии; та же воли Божией покорися, тем же в годину испытаний сестер мудрее спасе. Тем же припадаем ко святей матери нашей, да будет и нам наставницею доброю, слышаще от нас сицевая:

Радуйся, разумети благую волю Божию о нас научающая;

Радуйся, от суеты сует к благам вечным взоры наша направляющая;

Радуйся, от заблуждений и прельщений духовных чтущих тя оберегающая;

Радуйся, в ношении тягот друг друга нам всем

помогающая;
Радуйся, инокинем вспоможение и укрепление
посылающая;
Радуйся, мирян в благочестии и молитвенном
делании утверждающая;
Радуйся добрых друзей и помощников верных
Христианом посылающая;
Радуйся, в земнем странствии добре
путеводствующая;
Радуйся, святая преподобная мати наша
Рафаило, мученице Христова и чудотворице
достославная!

Кондак 6

Проповедница любви Христовой воистину была
еси, блаженная Рафаило, сирот бо во обители
прияла еси, от них же досаждения и укоризны
претерпела еси, обаче болезновала еси об их
обращении ко Господу, да с тобою воспоют
Творцу Своему:Аллилуйя!

Икос 6

Возвияла слава добродетелей твоих твоих, мати
любвеобильная, наипаче в годину смут и
нестроений: многим бо милость сотворила еси,
утешение и ободрение даровала еси; и сестрам
обители твоя была еси наставницею благою.
Мы веруя, яко ты ныне во славе неизреченной
пребываеши, милосердием твоим не оскудела

еси к нам, славословим тя сице:
Радуйся, от многообразных недугов страждущих
свобождение;
Радуйся, боли многообразныя пречудное
утоление;
Радуйся, ран и язв телесных исцеление;
Радуйся, душевных пороков искорение;
Радуйся, плоть, огнем опаленную, преславно
обновляющая;
Радуйся, души, от недугов греховных томимых,
врачующая;
Радуйся, путешествующих пречудная
помощнице;
Радуйся, во тьме неверия блуждающих
благодатная вразумительнице;
Радуйся, святая преподобная мати наша
Рафаило, мученице Христова и чудотворице
достославная!

Кондак 7

Хотяще верною Господеви быти и выну с Ним
токмо пребывати, разумела еси, велехвальная
Рафаило, яко ничто не возможе разлучити тя от
любве Его: ни глад, ни изгнание, ни чести
гражданския лишение, ни утеснения от властей
богоборных, ни сами страдания и муки
лютейшия. Ты бо все сие претерпела еси, в
глубине сердца твоего воспевая Жениху
Небесному ангельское пение: Аллилуйя!

Икос 7

Новое и тяжкое испытание с верою претерпела еси, богомудрая мати Рафаило, егда приидоша в дом твой богоборцы, от сестер отлучиша, и страшным мукам предаша. Обаче опаление и иссечение тела твоего и иных мук множество прияла с верою несомненною, тем же и от нас слышииши сицевая:

Радуйся, древним страстотерпцем равночестная и новым мученикам равнославная;

Радуйся, за безбоязненное веры исповедание от богоборец пострадавшая;

Радуйся, за Бога, в Троице Святей славимаго, муки лютыя приявшая;

Радуйся, опаление огнем, надругание и тела иссечение кротце претерпевшая;

Радуйся, биения, заушения, истязания лютыя приявшая;

Радуйся, в мучениях жестоких долготерпение и упование на Христа сохранявшая;

Радуйся, яко Горни силы душу твою с радостию среташа;

Радуйся, мучеников страданием твоим возвеселившая;

Радуйся, святая преподобная мати наша

Рафаило, мученице Христова и чудотворице достославная!

Кондак 8

Странствие земное в муках за Христа завершила еси, святая мати Рафило, и обитель себе в чертозах Отца Небеснаго обрела еси, прияла от Господа велию благодать чудотворения, тем же всем с верою к тебе притекающим дары благодатная всещедро подаеши от мощей твоих святых, недужных врачуеши едином пр

Икосновением к честному твоему гробу. Сего ради славим прославльшего Тя Господа и благодарно вопием Ему: Аллилуиа

Икос 8

Всем любящим тя и святую память твою праведно чтущим отраду и утешение милостивно подаеши, благая заступнице и утешительнице наша; сего ради мы, заботами и печальми обремененныя, к твоему предстательству за ны пред Триипостасным и Всеблагим Господем Нашим усердно прибегаем и с надеждою приносим тебе, святая мати наша Рафаило, от благодарных сердец наших похвалы сия:

Радуйся, яко чтущих тя не оставляеши;

Радуйся, яко любящих тя присно радуеши;

Радуйся, благим намерениям нашим быстро способствующая;

Радуйся, от всякаго вреда и скорби нас

избавляющая;
Радуйся, добрый кров и пристанище обрести
помогающая;
Радуйся, труд земледельцев с небес
благословляющая;
Радуйся, нивы и поля обилием плодов
наполняющая;
Радуйся, благами земныма страждущих
насыщати научающая;
Радуйся, святая преподобная мати наша
Рафаило, мученице Христова и чудотворице
достославная!

Кондак 9

Всякия болезни, скорби и мученическую
кончину кротко претерпела еси, мати Рафаило,
яко жертву принесши житие твое Христу Богу,
Спасителю нашему, и ныне, с Невещественными
ликама в вышних предстоящи Престолу Троицы
Пресвятыя, молишися о нас, вопиючи Богу:
Аллилуйя.

Икос 9

Вития многовещанныя и преискусныя
восхвалити тя по достоянию не возмогут, о
святая преподобная мученице и чудотворице
Рафаило, ибо кто в силех есть воспети достойно
и справедливо благочестивое житие твое, кто
воздаст славу преподобничеству, богомудрию и

исповедничеству твоему, мати пречудная, кто восхвалит велия муки душевныя и страдания лютыя, яже за Христа претерпела еси? Кто славословие сложит по достоянию чудесем и помощи твоей благодатней? Мы же, веруя, яко ты еси милостива к нам, со смирением и надеждою приносим ти похвалы сия:

Радуйся, злочестивых богоборцев и рая земнаго поборников богомудрая обличительнице;

Радуйся, богопротивнаго нечестия и обычаев душетленных неутомимая искоренительнице;

Радуйся, добрых нравов и благочестия преславная насадительница;

Радуйся, истиннаго богопознания и благаго трезвления всехвальная возвестительнице;

Радуйся, яко тобою от страстей телесных скоро избавляемся;

Радуйся, яко тобою отрады и сладости духовныя исполняемся;

Радуйся, заре благодатная, мрак скорбей людских разгоняющая;

Радуйся, светило богоявленное, тьму безбожия и зловерия просвещающее;

Радуйся, святая преподобная мати наша

Рафаило, мученице Христова и чудотворице достославная!

Кондак 10

Спасения нашего буди наставницею и ходатаицею, богоносная мати Рафаило, яко предстательством твоим страсти душектенныя из корени исторгаются, добродетели же богоугодныя вкореняются в душах наших; сего ради просим тя: сподоби ны Господеви благия плоды покаяния принести, поюще Богу: Аллилуйя!

Икос 10

Стена еси неборимая всем Христианом, к скорому твоему заступлению и предстательству притекающим, всепобедная стратотерпице Рафаило! Ты бо многожды самая прошения наша исполнением пречудно предваряеши и преславная чудеса творити нам не престаеши; ибо дадеся ти велия благодать от Подвигоположника Иисуса Христа, сугубо величающего мученики Своя: болезни исцеляти, во обстояниях скорбных помогати всем, требующим и просящим помощи твоея и с надеждою на исцеление духовное взывающим ти сице:

Радуйся, страх пред неизвестностию в душах наших разрушающая;

Радуйся, доверием ко Иисусу Сладчайшему сердца наша наполняющая;

Радуйся, любити всех любовью Христовою ны

научающая;

Радуйся, плевелы ненависти и злобы в нас
испепеляющая;

Радуйся, прощати и благословляти обидящих ны
сподвигающая;

Радуйся, злыя сердца в добрыя преславно
преображающая;

Радуйся, благия плоды надежды возвращати нам
помогающая;

Радуйся, великое и неизреченное милосердие
Божие к нам выну приклоняющая;

Радуйся, святая преподобная мати наша

Рафаило, мученице Христова и чудотворице
достославная!

Кондак 11

Пение похвальное во умилении сердец наших
приносим ти, о добрая попечительнице и
заступнице наша, яко тобою от сумрака скорбей
удаляемся, яко тобою николиже гладны не
пребываем, и вся потребная к житию земному; и
с тобою купно воспеваем Всемилосердному
Господу, Подателю всех благ: Аллилуйя!

Икос 11

Свет нетварный купно со ангелы и архангелы
созерцаеши ныне, богоблаженная мати наша
Рафаило, яко великия чести предстояти пред
Троном Троицы Всесвятыя сподобилася еси, и

нас грешных, на земли величающих благую память твою не забываеши в молитвах твоих, чудотворице святая, и вся полезная к житию земному и спасению милостивно посылаеши нам, с любовью и радостью взывающим ти сице:

Радуйся, в пути и странствии сущим благодатное вспоможение;

Радуйся, по воздуху плавающим преславное пути завершение;

Радуйся, паломников стяжати благословение Христово научающая;

Радуйся, всех нас от суеты и треволнений житейских свободяющая;

Радуйся, земныя должности наша честно исправляти помогающая;

Радуйся, вси путие жизни нашей к Иерусалиму Небесному направляющая;

Радуйся, милость Всенепорочныя Матери Божия нам приклоняющая;

Радуйся, кающихся грешников любовью Христовою ободряющая;

Радуйся, святая преподобная мати наша Рафаило, мученице Христова и чудотворице достославная!

Кондак 12

Благодати животворящая причастна явися священная рака, содержащая многоцелебныя

мощи твоя, чудотворице прехвальная Рафаило, яко ты неоскудно исцеления источаеши и всяк недуг врачуеши силою Бога, дивнаго во святых Своих; Ему же и мы о тебе с благодарностию и радостию сердечной о тебе воспеваем: Аллилуйя!

Икос 12

Поющее житие преславное твое и добропобедныя страдания твоя, святая мати наша и чудотворице Рафаило, величаем велию ревность и любви твоя, яже ко Господу и Спасителю нашему, торжествуем небесную славу твою, яко ты в сонме жен преподобных и мучениц велехвальных днесь предстоиши пред Престолом Агнца Божия, славословим предстательство за ны пред Всемогущим и Милосердным Творцом нашим и с надеждою зываем ти сице:

Радуйся, отроков и юношей в целомудрии и добронравии сохранять себе научающая;

Радуйся, девиц в кротости, чистоте и благости утверждатися помогающая;

Радуйся, мати святая, сердца чад ко родителем возвращающая;

Радуйся, отцев и матерей истинней любви к чадам наставляющая;

Радуйся, супругом любви и согласие дарующая;

Радуйся, раздоры семейныя на мир благий пременяющая;

Радуйся, старцем и старицем силы и радость,
пред закатом жития их дарующая;
Радуйся, прикровенно радости небесней еще на
земли сподобляющая;
Радуйся, святая преподобная мати наша
Рафаило, мученице Христова и чудотворице
достославная!

Кондак 13

О святая агнице Христова, преславная мати
Рафаило, преподобномученице и чудотворице,
заступнице и покровительнице наша
многомилостивая! Нынешнее приносимое тебе
от сердец наших моление приемше, и
всеблагомощным ходатайством твоим у
Всесвятых и Нераздельных Троицы сохрани ны
враг видимых и невидимых, от всяких бед,
болезней и скорбей и испроси всем,
призывающим тя, прочее время живота нашего
в мире, благополучии и истиннем покаянии
скончати, да сподобимся купно с тобою во веки
Господеви воспевати: Аллилуйя!

